



阿姆个煎包

阿姊這駁仔願著去買一攤在巷仔肚賣个煎包。

這攤仔在大埤湖附近个臨暗仔市場，下晝四點邊仔開始賣，煎好一起鑊，一下仔就分人客搶淨淨。頭家無限制每一個人客做得買幾多，故所每個人都大攞細攞買盡多，一家大細都有好食，做點心止飢，準夜食乜食得飽。頭家佢等三個人現做現煎，無閒泊杈，下一鑊就愛過等八、九分鐘，想食个人就繼續等，正經係人講个「排隊美食」。

佢同阿姊都毋係重視好食个口味，興撮撮仔跔人排隊个人。阿姊願食，係因為這攤做個煎包，盡有阿姆个味緒。

佢讀國小个時節，阿姆識去一間高職个福利社食頭路，同幾下個師傅共下做飯包、煮麵、煮紅茶。該學校還有補校，除核愛應付當晝頭肚飢、來就擒煞煞个學生仔，還有暗晡頭食咁夜正愛去上課个夜間部學生仔。一日煮這兩餐，係盡耗損體力个事頭。

無幾多年，政府規定學校个福利社都愛收起來。阿姆愁慮愛去哪食頭路正好，裡背有一個師傅係外省人，本旦就盡會做麵食類，又知阿姆有佢等三個細人仔還在讀書，正愛使錢，就邀阿姆去佢歇个巷仔肚賣煎包同豆乳。該師傅蓋好心，將佢个本事完完全全教分阿姆。

阿姆做煎包，料頭除核豬肉，愛放盡多高麗菜。用機器切个毋比得手工切个，毋過手工切實在痠，阿姆就用菜刷仔刷，刷好掖鹽搭搭啊，裝入麵粉袋仔拿去洗衫機該脫水，又遽又好勢。過來呢，佢會放豬油粕，還會攞多一息薑麻壓味，一半切到幼幼仔，一半磨汁出來攪在豬肉裡背。佢毋愛攞中藥店个五香粉，恁仔，過食得出菜同肉本來个甜味。

發麵愛用酵麻同麵粉，慢慢仔加水，充分个揉到毋會黏手。麵糰發好，就做得包料仔落鑊煎咁！煎个時節油愛罇擺，還愛有麵粉水，半煎半蒸昇熟。煎到兩面赤赤，鑊蓋掀起來，實在噴香哦！膨膨个煎包就好咁！趕燒食，搵佢等客人特別愛个七層塔豆油醋，好食到舌麻都會吞落去！每擺阿姆係在屋下做煎包，佢都愛食到攞肚屎毋贏咁，正甘願放核筷仔。

阿姆講，頭擺做細妹時，盡好在灶下抹抹摸摸，阿公就會罵佢：「搵食就盡會！」今係恁起，好得阿姆恁好「搵食」，正好好靠這手藝絡食，畜佢等三個細人仔大。阿姆走咁會九年咁，佢不時怪怨阿姊，無學著阿姆个煎包仰仔做，佢自家毋係共樣懶尸無學啊？

阿姊又過買煎包歸來食咁，這煎包个味緒，係思念阿姆个味緒。

作者：吳秀梅

☆詞彙學習☆

【願著】ngian doː：迷上。對某項事物上癮。

【料頭】liau teuː：餡料。

【大埤湖】tai biː fuː：高雄的澄清湖，舊稱「大貝湖」或「大埤湖」。

【菜刷仔】coi sodː eː：將菜刨絲的器具。

【興撮撮仔】him cod cod eː：興致高昂的。

【豬油粕】zuː iuː pogː：炸完豬油剩下的殘渣。又可說成「豬油渣(zuː iuː zaː)」。

【擒煞煞】kimː sadː sadː：擠得水洩不通。

【搵】miedː：搞、做，是較為粗俗的說法。